

UPUTSTVO ZA PACIJENTA

Δ CITRAM

10 mg filmom obložena tableta

escitalopram

Prije upotrebe lijeka pažljivo pročitajte ovo uputstvo.

Uputstvo nemojte bacati. Možda ćete ga htjeti ponovo pročitati.

Ako imate dodatna pitanja, posavjetujte se sa ljekarom ili farmaceutom.

Lijek je propisan lično Vama, zato ga ne smijete davati drugima. Drugima taj lijek može štetiti, čak iako imaju simptome bolesti, koji su slični Vašima.

Ako primijetite da je neželjeni efekat lijeka postao ozbiljan ili uočite neželjeni efekat koji nije naveden u uputstvu, obavijestite o tome svog ljekara ili farmaceuta.

Uputstvo sadrži:

1. Šta je CITRAM i za šta se koristi?
2. Prije nego počnete uzimati CITRAM
3. Kako uzimati CITRAM?
4. Moguće nuspojave
5. Kako čuvati CITRAM?
6. Dodatne informacije

1. ŠTA JE CITRAM I ZA ŠTA SE KORISTI?

Citram sadrži djelotvornu supstancu escitalopram.

Escitalopram pripada skupini antidepresiva koji se nazivaju selektivni inhibitori ponovnog preuzimanja serotonina (SSRI). Ti lijekovi djeluju na serotoninski sistem u mozgu povećavajući nivo serotonina. Poremećaji serotoninskog sistema se smatraju značajnim faktorom u razvoju depresije i srodnih poremećaja.

Citram se koristi za liječenje depresije (velikih depresivnih epizoda) i tjeskobnih poremećaja (kao što su panični poremećaj s ili bez agorafobije - strah od otvorenog prostora i javnih mjesta, socijalni anksiozni poremećaj, generalizirani anksiozni poremećaj i opsesivno-kompulzivni poremećaj).

2. PRIJE NEGO POČNETE UZIMATI CITRAM

Nemojte uzimati CITRAM:

- ako ste preosjetljivi na escitalopram ili neki od pomoćnih sastojaka lijeka
- ako uzimate lijekove iz skupine inhibitora monoamino oksidaze (MAO inhibitore), uključujući selegilin (koristi se za liječenje Parkinsonove bolesti), moklobemid (koristi se za liječenje depresije) i linezolid (antibiotik, lijek za liječenje bakterijskih infekcija).
- ako ste imali epizodu poremećaja srčanog ritma ili ste rođeni s njim (uočeno EKG-om, pregledom koji se koristi za procjenu rada srca)
- ako uzimate lijekove za liječenje poremećaja srčanog ritma ili one koji mogu utjecati na srčani ritam (pogledajte dio 2. **Drugi lijekovi i CITRAM**).

Upozorenja i mjere opreza

Obavijestite svog ljekara ako imate bilo kakvih zdravstvenih problema, jer će možda to trebati uzeti u obzir. Osobito je važno da obavijestite ljekara ako:

- imate epilepsiju. Liječenje CITRAMOM se treba prekinuti ako se pojave napadi ili se poveća njihova učestalost. (pogledajte dio 4.)
- imate oštećenje funkcije jetre ili bubrega. Možda će biti potrebno prilagoditi dozu lijeka.
- imate šećernu bolest. Liječenje CITRAMOM može promijeniti kontrolu šećera u krvi. Možda će biti potrebno prilagoditi doze inzulina i/ili oralnih antidijabetika.
- ako imate smanjen nivo natrija u krvi
- ako ste skloni krvarenju ili stvaranju modrica
- ako ste u toku liječenja elektrokonvulzivnom terapijom
- ako imate koronarnu bolest srca.
- ako imate ili ste imali problema sa srcem ili ste nedavno imali srčani udar

- ako imate nizak broj otkucaja srca u mirovanju i/ili znate da možda imate manjak soli kao posljedicu dužeg teškog proljeva i povraćanja ili korištenja diuretika (tablete za pojačano izlučivanje mokraće)
- ako imate brz ili nepravilan rad srca, nesvjesticu ili vrtoglavicu prilikom ustajanja, koji mogu ukazivati na nepravilne otkucaje srca
- ako imate ili ste prije imali bolesti oka, kao što je glaukom (povišen pritisak u oku)

Neki bolesnici s manično-depresivnim poremećajem mogu ući u maničnu fazu. Ona je karakterizirana neuobičajenim idejama koje se brzo izmjenjuju, neadekvatnim osjećajem sreće i pretjeranom fizičkom aktivnošću. U slučaju pojave navedenih simptoma odmah se obratite svom ljekaru.

Simptomi kao što je uznemirenost ili nemogućnost mirnog sjedenja ili stajanja također se mogu pojaviti tokom prve sedmice liječenja. Javite se svom ljekaru ukoliko se pojave ovakvi simptomi.

Lijekovi poput Citrama (takozvani SSRI-ovi/SNRI-ovi) mogu uzrokovati simptome poremećaja seksualne funkcije (vidjeti dio 4). U nekim su se slučajevima ti simptomi nastavili nakon prestanka liječenja.

Samobilačke misli i pogoršanje Vaše depresije ili anksioznog poremećaja (poremećaja tjeskobe)

Ako bolujete od depresije ili anksioznog poremećaja, povremeno se mogu javiti misli o samoozljeđivanju ili samoubojstvu. Ovi simptomi se mogu i pojačati na početku liječenja antidepresivima, jer je potrebno određeno vrijeme, obično dvije sedmice, a ponekad i duže, da ti lijekovi počnu djelovati.

Takve misli se češće javljaju:

- ako ste već i prije razmišljali o samoozljeđivanju ili samoubojstvu
- u mlađih odraslih osoba. Podaci iz kliničkih ispitivanja ukazuju na povećan rizik suicidalnog ponašanja u odraslih osoba mlađih od 25 godina s psihijatrijskim poremećajima koji se liječe antidepresivima.

Ako bilo kada razmišljate o samoozljeđivanju ili samoubojstvu, **odmah se javite svom ljekaru ili u bolnicu.**

Od pomoći može biti i da razgovarate s rođakom ili bliskim prijateljem o svojoj depresiji ili anksioznom poremećaju te da ih zamolite da pročitaju ovo uputstvo. Možete ih zamoliti za mišljenje da li se Vaša depresija pogoršava ili brinu li ih promjene u Vašem ponašanju.

Djeca i adolescenti

CITRAM tablete nisu namijenjene za liječenje djece i adolescenata do 18 godina. Također je potrebno znati da u bolesnika mlađih od 18 godina prilikom uzimanja lijekova iz te skupine postoji povećan rizik nuspojava kao što su pokušaj samoubojstva, razmišljanja o samoubojstvu i neprijateljsko ponašanje (uglavnom agresivnost, otpor i bijes). Unatoč tome ljekar može propisati CITRAM bolesnicima mlađim od 18 godina, ako procijeni da je to potrebno. Ako je ljekar propisao CITRAM bolesniku mlađem od 18 godina, a Vi želite o tome razgovarati, molimo Vas javite se svom ljekaru. Obavijestite svog ljekara ako se razvije bilo koji od gore navedenih simptoma ili dođe do njihovog pogoršanja u bolesnika mlađeg od 18 godina koji se liječi CITRAMOM. Dosadašnjim kliničkim ispitivanjima nije dokazana djelotvornost i dugotrajna sigurnost primjene lijeka Citram u djece i adolescenata do 18 godina u pogledu rasta i razvoja te intelektualnog sazrijevanja i razvoja ponašanja.

Drugi lijekovi i Citram

Obavijestite svog ljekara ili farmaceuta ako uzimate ili ste nedavno uzeli ili biste mogli uzeti bilo koje druge lijekove.

Ljekar

Prije primjene CITRAM tableta obavijestite ljekara ako uzimate bilo koji od niže navedenih lijekova:

- neselektivne inhibitore monoaminoooksidaze (MAO inhibitore - lijekove za liječenje depresije), uključujući fenelzin, ipronijazid, izokarboksazid, nialamid i tranilcipromin. Ako ste uzimali bilo koji od navedenih lijekova, potrebno je pričekati 14 dana prije početka liječenja CITRAM tabletama. Nakon prestanka uzimanja CITRAM tableta liječenje navedenim lijekovima se može započeti tek nakon stanke od 7 dana.
- reverzibilne selektivne MAO-A inhibitore, kao što je moklobemid (lijek za liječenje depresije)

- ireverzibilne MAO-B inhibitore, kao što je selegilin (lijek za liječenje Parkinsonove bolesti). Prilikom istodobne primjene s CITRAM tabletama povećan je rizik nuspojava.
- antibiotik linezolid
- litij (koristi se u liječenju manično-depresivnog poremećaja) i triptofan (aminokiselina koja se mora unositi hranom)
- imipramin i dezipramin (lijekovi za liječenje depresije)
- sumatriptan i slične lijekove (koristi se u liječenju migrene) te tramadol (lijek za liječenje jačih bolova). Prilikom istodobne primjene s CITRAM tabletama povećan je rizik nuspojava.
- cimetidin, lansoprazol i omeprazol (lijekovi za liječenje želučanog vrieda), flukonazol, koji se koristi za liječenje gljivičnih infekcija, fluvoksamin (lijek za liječenje depresije), tiklopidin (koristi se u prevenciji moždanog udara). Istodobna primjena ovih lijekova može dovesti do povećane razine lijeka CITRAM u krvi.
- gospinu travu (*Hypericum perforatum*) - biljni pripravak za depresiju
- acetilsalicilatnu kiselinu i nesteroidne protuupalne lijekove (koriste se za ublažavanje bolova i za sprječavanje zgrušavanja krvi). Mogu povećati sklonost krvarenju.
- varfarin, dipiridamol i fenpropukon (lijekovi protiv zgrušavanja krvi). Vaš ljekar će vjerojatno provjeriti vrijeme zgrušavanja prije uvođenja i prije prekida liječenja CITRAM tabletama, kako bi se provjerila i po potrebi prilagodila doza navedenih lijekova.
- meflokin (lijek za liječenje malarije), bupropion (lijek za liječenje depresije) i tramadol (lijek za liječenje jake boli). Ovi lijekovi mogu sniziti prag izbijanja epileptičkih napada.
- neuroleptike (lijekove za liječenje shizofrenije, psihoza) i antidepresive (triciklički antidepresivi i SSRI (selektivni inhibitori ponovne pohrane serotonina)) zbog mogućeg rizika snižavanja praga izbijanja epileptičkih napada
- flekainid, propafenon i metoprolol (lijekovi za liječenje bolesti srca i krvnih žila), klomipramin i nortriptilin (antidepresivi), risperidon, tioridazin i haloperidol (antipsihotici). Možda će biti potrebno prilagoditi dozu CITRAM tableta.
- lijekovi koji snižavaju razine kalija i magnezija u krvi jer ova stanja mogu povećati rizik nastanka poremećaja srčanog ritma opasnog po život.

Nemojte uzimati CITRAM ako uzimate lijekove zbog problema sa srčanim ritmom ili lijekove koji mogu utjecati na srčni ritam poput antiaritmika razreda IA i III, antipsihotika (npr. derivati fenotiazina, pimozid, haloperidol), tricikličkih antidepresiva, nekih antimikrobika (npr. sparfloksacin, moksifloksacin, eritromicin IV, pentamidin, antimalarici posebno halofantrin) i nekih antihistaminika (astemizol, mizolastin). Ako trebate dodatne informacije u vezi ovoga, obratite se Vašem ljekaru.

Citram s hranom, pićem i alkoholom.

CITRAM se može uzimati s hranom ili bez nje. (pogledajte dio 3.).

Kao i kod mnogih drugih lijekova, kombinacija CITRAMA s alkoholom se ne preporučuje, iako se ne očekuju njihove interakcije.

Trudnoća, dojenje i plodnost

Ako ste trudni ili dojite, mislite da biste mogli biti trudni ili planirate trudnoću, obratite se Vašem ljekaru ili farmaceutu za savjet prije nego uzmete ovaj lijek.

Ne uzimajte Citram ako ste trudni ili ako dojite ukoliko s Vašim ljekarom niste prodiskutirali moguće rizike i koristi liječenja. Ako uzimate CITRAM tokom posljednja 3 mjeseca trudnoće u Vašeg novorođenčeta se mogu pojaviti sljedeći učinci: poteškoće s disanjem, plavkasta koža, epileptički napadi, promjene tjelesne temperature, poteškoće s hranjenjem, povraćanje, niska razina šećera u krvi, povećan tonus ili mlohavost mišića, pojačani refleksi, tremor, uznemirenost, razdražljivost, letargija, neprekidan plač, pospanost ili poteškoće sa spavanjem. Ako se u Vašeg novorođenčeta pojavi bilo koji od navedenih simptoma, odmah se obratite ljekaru.

Pobrinite se da Vaš primalja i ljekar znaju da uzimate CITRAM. Kada se uzima za vrijeme trudnoće, osobito zadnja 3 mjeseca, lijekovi kao CITRAM mogu povećati rizik nastanka ozbiljnog stanja koje se zove perzistentna pulmonalna hipertenzija kod novorođenčeta (PPHN), uzrokujući ubrzano disanje te dijete poplavi. Ovi simptomi se javljaju uobičajno u prva 24 sata nakon poroda. Ako se ovi simptomi pojave, odmah se javite Vašem ljekaru ili primalji.

Ako se koristi tokom trudnoće, ovaj lijek ne smije se naglo prestati uzimati.

tokomljekaruljekarOčekuje se izlučivanje ovog lijeka u majčinom mlijeku.

Ispitivanja na životinjama pokazala su da citalopram, lijek sličan escitalopramu, smanjuje kvalitetu sperme. Teoretski bi to moglo utjecati na plodnost, ali utjecaj na plodnost u ljudi nije još primijećen

Upravljanje vozilima i mašinama

Δ Trigonik, lijek sa mogućim uticajem na psihofizičke sposobnosti (upozorenje prilikom upravljanja matornim vozilima i mašinama).

Svaki psihoaktivni lijek može promijeniti sposobnost procjenjivanja, odnosno vještine. Ne upravljajte vozilima i mašinama dok ne utvrdite kako CITRAM djeluje na Vas.

3. KAKO UZIMATI CITRAM?

Uvijek uzmite ovaj lijek tačno onako kako je opisano u ovoj uputi ili kako Vam je rekao Vaš ljekar. Provjerite sa svojim ljekarom ili farmaceutom ako niste sigurni.

Ijekar

CITRAM 10 mg tableta ima razdjelnu liniju koja omogućava lomljenje tablete na dva dijela, pri čemu se osigurava da 1 polovica tablete sadrži 5 mg

Odrasli

Depresija

Uobičajena doza CITRAMA iznosi 10 mg jedanput na dan. Vaš ljekar može povećati dozu do maksimalno 20 mg dnevno.

Panični poremećaj

Početna doza CITRAMA iznosi 5 mg jedanput na dan tokom sedam dana, a zatim se povećava na 10 mg na dan. Vaš ljekar može dodatno povisiti dozu do najviše 20 mg dnevno.

Socijalni anksiozni poremećaj

Uobičajena doza je 10 mg CITRAMA jedanput na dan. Vaš ljekar može po potrebi ili smanjiti dozu na 5 mg ili je povećati do maksimalno 20 mg dnevno.

Generalizirani anksiozni poremećaj

Uobičajena početna doza je 10 mg jedanput na dan. Vaš ljekar može povisiti dozu do maksimalno 20 mg dnevno.

Opsesivno-kompulzivni poremećaj

Uobičajena početna doza je 10 mg jedanput na dan. Vaš ljekar može povisiti dozu do maksimalno 20 mg dnevno.

Stariji bolesnici (iznad 65 godina)

Preporučena početna doza iznosi 5 mg na dan, uzeta jednokratno. Vaš ljekar može povisiti dozu do 10 mg na dan.

Djeca i adolescenti (mlađi od 18 godina)

CITRAM se ne smije primjenjivati u liječenju djece i adolescenata. Dodatne informacije potražite u poglavlju 2.

Način primjene

CITRAM se uzima jedanput na dan i može se uzimati s hranom ili bez nje. Tabletu progutajte s malo vode. Nemojte ih žvakati jer su gorkog okusa. Ovisno o tome što Vam je rekao Vaš ljekar, uzimajte polovicu ili cijelu tabletu.

Trajanje liječenja

Može proći i nekoliko sedmica prije nego se počnete osjećati bolje. Stoga nastavite uzimati CITRAM tablete čak i onda kad treba vremena da osjetite poboljšanje.

Nemojte sami mijenjati dozu lijeka bez prethodnog razgovora s Vašim ljekarom.

Nastavite uzimati CITRAM toliko dugo koliko Vam to savjetuje ljekar. Ako prerano prekinete liječenje, Vaši simptomi se mogu vratiti. Stoga se preporučuje liječenje nastaviti najmanje 6 mjeseci nakon što se počnete osjećati bolje.

Ako uzmete više CITRAMA nego što ste trebali

Ako uzmete više CITRAM tableta nego što ste trebali, obratite se svom ljekaru ili u najbližu zdravstvenu ustanovu, čak i ako nemate nikakvih tegoba. Sa sobom ponesite i ovo uputstvo ili kutiju/spremnik CITRAMA, kako bi zdravstveno osoblje znalo koji ste lijek uzeli. Neki od znakova predoziranja mogu biti: omaglica, tremor, razdražljivost, konvulzije, koma, mučnina, povraćanje, promjene srčanog ritma, snižen krvni pritisak, promjene ravnoteže tekućine/elektrolita.

Ako ste zaboravili uzeti CITRAM

Ako zaboravite uzeti dozu lijeka, uzmite je odmah čim se sjetite. Sljedećeg dana nastavite uzimati lijek kao obično. Nemojte uzeti dvije doze u jednom danu.

Ako prestanete uzimati CITRAM

Nemojte prestati uzimati CITRAM samo zato što se osjećate bolje. Važno je da nastavite uzimanje lijeka onoliko dugo koliko Vam je preporučio Vaš ljekar.

Nakon što je liječenje završeno, dozu CITRAMA je potrebno postupno smanjivati tokom nekoliko sedmica.

Prestanak uzimanja CITRAMA, osobito nagli, može uzrokovati simptome sustezanja. Rizik je veći ako je liječenje CITRAMOM trajalo dugo, u velikoj dozi ili se doza prebrzo smanjivala. U većine bolesnika simptomi su blagi i prolaze sami od sebe unutar dvije sedmice. Ipak, u nekih bolesnika ti simptomi mogu biti ozbiljnijeg intenziteta ili produženog trajanja (2-3 mjeseca ili duže). Ako nakon prestanka liječenja CITRAMOM razvijete teže simptome sustezanja, obavijestite o tome svog ljekara. On Vam može savjetovati da ponovno počnete uzimati lijek, a potom još postupnije smanjivati dozu.

Simptomi sustezanja uključuju: osjećaj omaglice (nesigurno držanje ili gubitak ravnoteže), trnce, pečenje i rjeđe osjet poput udara električne struje, poremećaje spavanja (živopisni snovi, noćne more, nesanica), tjeskobu, glavobolju, mučninu, znojenje (uključujući i noćno znojenje), nemir, razdražljivost, tremor (drhtanje), zbunjenost ili dezorijentaciju, emotivnost, iritabilnost, proljev, smetnje vida, lupanje srca (palpitacije).

U slučaju bilo kakvih nejasnoća ili pitanja u vezi s primjenom CITRAMA, obratite se svom ljekaru ili farmaceutu.

4. MOGUĆE NUSPOJAVE

Kao i svi drugi lijekovi CITRAM može izazvati nuspojave.

Nuspojave su općenito blage i obično nestaju nakon nekoliko sedmica liječenja. Mnogi od ovih efekata mogu također biti i simptomi bolesti od koje bolujete i stoga iščezavaju kad se počnete osjećati bolje.

Javite se svom ljekaru ako tokom liječenja primijetite neku od sljedećih nuspojava:

Manje često (mogu se javiti u manje od 1 na 100 osoba):

- neuobičajena krvarenja, uključujući gastrointestinalna krvarenja

Rijetko (mogu se javiti u manje od 1 na 1 000 osoba):

- oticanje kože, jezika, usana ili lica, otežano disanje ili gutanje (simptomi alergijske reakcije)
- visoka vrućica, uznemirenost, smetenost, drhtanje ili nagle kontrakcije mišića, to mogu biti znakovi rijetkog stanja koje se naziva serotoniniski sindrom.

Nepoznato (učestalost se ne može procijeniti iz dostupnih podataka):

- naglo oticanje kože i sluznica, koje obično zahvaća lice, usne, jezik i očne kapke (angioedem)
- nepotpuno pražnjenje mokraćnog mjehura ili prestanak mokrenja (znakovi zadržavanja mokraće)
- napadi (također pogledajte dio 2.)
- žutilo kože i bjeloočnica (znaci oštećenja funkcije jetre ili hepatitisa (upale jetre))
- brzo nepravilno kucanje srca i nesvjestica (simptomi po život opasnog stanja poznatog kao torsade de pointes)

- misli o samoozljeđivanju ili misli o samoubojstvu (također pogledajte dio 2.)

Uz gore navedene, zabilježene su i sljedeće nuspojave:

Vrlo često (mogu se javiti u više od 1 na 10 osoba):

- mučnina
- glavobolja.

Često (mogu se javiti u manje od 1 na 10 osoba):

- začepljen nos ili curenje nosa (upala sinusa)
- smanjen ili povećan apetit
- tjeskoba, nemir, abnormalni snovi, smetnje usnivanja, pospanost, omaglica, zijevanje, nevoljno drhtanje, trnci po koži
- proljev, zatvor, povraćanje, suhoća usta
- pojačano znojenje
- bolovi u mišićima i zglobovima
- poremećaji seksualne funkcije (odloženo izbacivanje sjemena (ejakulacija), problemi s erekcijom, smanjena seksualna želja, žene mogu imati teškoća u postizanju orgazma),
- umor, vrućica
- povećanje tjelesne težine

Manje često (mogu se javiti u manje od 1 na 100 osoba):

- urtikarija, osip, svrbež
- škrgutanje zubima, uznemirenost, nervoza, napadaji panike, smetenost
- poremećaj spavanja, promjene okusa, nesvjestica (sinkopa)
- proširenje zjenica, smetnje vida, zvonjava u ušima
- gubitak kose
- prekomjerno menstrualno krvarenje
- krvarenje između mjesečnica
- smanjenje tjelesne težine
- ubrzani otkucaji srca
- oticanje ruku ili nogu
- krvarenja iz nosa

Rijetko (mogu se javiti u manje od 1 na 1000 osoba):

- agresija, depersonalizacija, halucinacije
- usporen rad srca.

Nepoznato (učestalost se ne može procijeniti iz dostupnih podataka):

- smanjenje razine natrija u krvi (simptomi uključuju: mučninu i loše osjećanje praćeno slabošću mišića ili smetenošću)
- omaglica kod ustajanja zbog pada krvnog pritiska
- abnormalni testovi jetrene funkcije (povećana količina jetrenih enzima u krvi)
- poremećaji pokreta (nevoljni pokreti mišića)
- bolna erekcija
- znakovi povećanog krvarenja na primjer u kožu i sluznice
- povećanje količine izlučenog urina (posljedica neadekvatnog lučenja antidiuretskog hormona)
- izlučivanje mlijeka u muškarca i žena koje nisu dojilje
- manija
- povećani rizik od prijeloma kostiju u bolesnika koji uzimaju ovu vrstu lijekova
- promjena srčanog ritma (tzv. produljenje QT intervala, registrirano na EKG-u, kojim se bilježi električna aktivnost srca).

Osim toga, poznato je da se neke nuspojave javljaju s lijekovima koji djeluju na sličan način kao i escitalopram (djelatna tvar lijeka Citram). To su:

- motorički nemir
- gubitak apetita

Prijavlivanje sumnje na neželjena dejstva lijeka

U slučaju bilo kakvih neželjenih reakcija nakon primjene lijeka, potrebno je obavjestiti Vašeg ljekara ili farmaceuta. Ovo podrazumijeva sve moguće neželjene reakcije koje nisu navedene u ovom uputstvu o lijeku, kao i one koje jesu.

Ako primijetite bilo koju nuspojavu potrebno je obavijestiti ljekara ili farmaceuta.

Prijavlivanjem nuspojava možete pridonijeti u procjeni sigurnosti ovog lijeka.

5. KAKO ČUVATI CITRAM

CITRAM morate čuvati izvan dohvata i pogleda djece!

Rok trajanja: 4 (četiri) godine

Lijek čuvati do 25° C.

CITRAM se ne smije upotrijebiti nakon isteka roka upotrebe navedenog na pakovanju.

Lijekovi se ne smiju odlagati putem kućnih otpadnih voda ili kućnog otpada. Pitajte farmaceuta kako odlagati lijekove koje više ne trebate. Takvim ponašanjem čuvamo našu okolinu.

6. DODATNE INFORMACIJE

Šta sadrži CITRAM?

Djelatna supstanca je escitalopram.

Jedna filmom obložena tableta sadrži 10 mg escitaloprama u obliku escitalopram oksalata.

Pomoćne supstance su:

Tabletna jezgra: celuloza, mikrokristalična; silicijev dioksid, koloidni, bezvodni; povidon; karmelozanatrij umrežena; talk; magnezijev stearat.

Film ovojnica: hipromeloza; boja titanijev dioksid (E171); makrogol.

Kako CITRAM izgleda i sadržaj pakovanja

Bijela do gotovo bijela, okrugla, bikonveksna, filmom obložena tableta s razdjelnom crtom.

28 (2x14) tableta u blisteru, u kutiji.

Način i mjesto izdavanja lijeka

Lijek se izdaje uz ljekarski recept.

7. PROIZVOĐAČ

FARMAVITA d.o.o. SARAJEVO

Igmanska 5a, 71320 Vogošća, Bosna i Hercegovina

PROIZVOĐAČ GOTOVOG LIJEKA

FARMAVITA d.o.o. SARAJEVO

Igmanska 5a, 71320 Vogošća, Bosna i Hercegovina

NOSILAC DOZVOLE ZA STAVLJANJE LIJEKA U PROMET

FARMAVITA d.o.o. SARAJEVO

Igmanska 5a, 71320 Vogošća, Bosna i Hercegovina

8. DATUM I BROJ OBNOVE DOZVOLE ZA STAVLJANJE LIJEKA U PROMET

Citram, 10 mg filmom obložena tableta: 04-07.3-2-8703/20 od 02.06.2021.